

Taetas

Nəkwəkwə yame Pol rimirai kimi Taetas

Nəgkarien kupən ye nəkwəkwə e Taetas

?Pa rimirai nəkwəkwə e? Aposol Pol rimirai nəkwəkwə e.

?Rimirai ramvən kimi pa? Pol rimirai nəkwəkwə e ramvən kimi Taetas. Taetas in yemə Gris kirik yame rhatətə ye Kristo. Pol rimivi-pə in ramni nəfrakisien ye Yesu. Kini Taetas rimnor wok ripsaah iriu Pol rəmhen kin Timoti. Kamni nhagin rehuə ye Niutesteman.

?Narəyen rimnhawor pən iran mine nipig rimirai? Pol mine Taetas kimiravən ye kwaji tanə e Krit, kini iriu kimirərikakun niməhuak kirik aikin. Kimirərikakun niməhuak, Pol rier min, mipəh Taetas raməmir mə tukror infamien ye wok a. Krit in kwaji tanə kirik yame rukwar kin norien has minə, rəmhen kin in e narmamə kaseikuə pik nipig mifam, masəvigin pik, misarpah pik. Tiksin khauə ye niməhuak mamhani nəgkarien eikuə ripsaah, mishajoun əmə tuk mane.

?Rimirai nəkwəkwə e tuk naha? Pol rorkeikei mə tukrasitu ye Taetas tuk kafan wok apa niməhuak apa Krit. Taetas tukraməkeikei mivəhsi-haktə narmamə mə tukhauə elda minə ye niməhuak. Kini Pol raməvhag kimi Taetas mə tukrhawor pən iran mine kimi narmamə yamə mine khapəh nisəri-pənien nərigien kafan. Kini mivəhsi-pən nəgkarien tiksin kape nhatətəyen mine nəriwək-atuatuk-ien. Kini mimə Taetas tukrətapig huvə kin nəmhajoun eikuə minə. Nəgkarien infamien ramni mə Pol tukrher-pə yermamə kirik yame tukrivəh tamhek Taetas, pəh Taetes tukruə tuk Pol mamasitu iran.

Pol rimə nəkwəkwə e ramvən kimi Taetas

1 ¹ Taetas, yo Pol. Yakamrai nəkwəkwə e kimik. Yo, yorwok kirik kape Kughen, kini yo aposol kirik kape Yesu Kristo. In rimirpen yo mə jakasitu ye narmamə yamə mine Kughen ruirpen-ta əriə mə kafan minə, mivəhsi-haktə nhatətəyen kapəriə, masitu irəriə

mə tukharkun nəgkiarien əfrakis, mhauə misor nəkwai Kughen.

²Kitawə kharkun nəfrakisien a, kini mishatətə iran. Kini misərəhu-pən nərgien kapətawə mə tukhavəh nımraghien rerin, meinai in apa kupən kupən, nıpig Kughen rimipəh nor-hanəyen nar kirik, mərig In ruirpen-ta nımraghien rerin a. Kini Kughen, In to rapəh neikuəyen.^a

³Kini ye nıpig atuutuk kafan, nəgkiarien kafan ruauə ye nikhakien, meinai Kughen yame rimivəh miragh ətawə rımnərəhu-pə wok e ye kwermik, miwəhsi-pə nəgkiarien kirik mə jakni-ərhav Nəgkiarien Huvə kafan kimi narmamə.

⁴Taetas, ik pikwarien əgkəp kafak meinai nhatətəyen kapərau rəm nəmhen. Pəh Kughen, Rımtawə, mine Yesu Kristo Yermaru kapətawə, iriı tukravəhsi-pre nihuvəyen mine nəmərınuyen kimik.^b

Norien yame Taetas rımnor apa Krit

⁵Nıpig yimatərhav ye tanə a Krit, mamapəh ik nakaməmır, mə takaməkeiki mor infamien ye wok yame ramswın hanə, mivəhsi-haktə elda minə kape nıməhuak yerkwanu minə fam ye tanə Krit, rəmhen kin yame yimini-pre ta tuk ik. ⁶Mərig elda, to kıpəh nəm-pənien nar hah kirik iran. In, kafan piraovin kirikianə əmə. Kafan kwajikovə minə tukasəkeiki mishatətə ye Kughen, mhapəh nısor-apnapıgien nar, mhapəh nısəsikien nəkwai rımrıə mine nısınrıə, tamə kini hah ərıə tukun. ⁷Elda^c to kıpəh nəm-pənien nar hah kirik iran meinai Kughen rımnərəhu-pən wok ehua ye kwermın. Pəh nien mə in yermamə yame kapən kapə riskai pik. To niemha rıpəh nhai-aihuayen. Pəh nien mə in yermamə kape nıpsien kin nınimien mine nəmhokien mine neikuəyen tuk nivəhyen mane. ⁸Mərig kafan nımraghien tukraməkeiki mor məkneikin: In ramarha huvə tuk narmamə yamə mine kamhauə iman ikin, morkeiki mə tukramor norien yame rhuvə, mamor narımnar ye nirkunien. Norien kafan ratuutuk. Ramarha huvə tuk kafan nımraghien. ⁹Tukraməkeiki mamraptərəkin tım tım Nəgkiarien Huvə kape Kughen, yame kımnhajoun in kin, pəh in tukrəvhag kimi narmamə kin nəgkiarien atuutuk, kini mapıta narmamə yamə mine kamhani hah nhajounien kafan.^d

¹⁰Vəh-si haktə elda tıksın meinai ikin aikin a, narmamə khapsaah kımishaktə mashorukun Nəgkiarien Huvə kape Kughen. Masəgkiar pik, nıpran rırəkək, miseikuə, masəvi kimi narmamə. Iriə khapsaah kwənərəus kape nəmə Isrel.^{e f} ¹¹Tukaməkeiki kətapıg kin nəgkiarien kapəriə, meinai nhajounien kapəriə ramoriah narmamə tıksın kamhamır

^a 1:2 Kol 1:27 ^b 1:4 Rom 1:7; 2 Kor 8:23; Gal 2:3 ^c 1:7 Uə pasta. ^d 1:6-9 1 Tim 3:2-7; 2 Tim 2:24-26 ^e 1:10 Uə, iriə khapsaah kape kwhen e kamni kımə “Sakomsaes” yame ramni mə tukaməkeiki kəsıg pən Kristin minə. ^f 1:10 1 Tim 4:7

iriā kapəriā narmamə minə. Nhajounien kapəriā rapəh nəmhenien. Kashajoun məkna miseikuə tuk niwəhyen mane. ¹²Rəmhen kin kwən Krit kirik kupən, in profet kirik kapəriā, rimini mə, “Nəmə Krit, iriā narmamə kape neikuəyen nipig m-fam. Kisəmhen kin kuri aparū minə. Kini iriā kasarpah, nipig m-fam misorkeikei əmə mə tuksəvigin.” ¹³Mərig nəgkiarien kape profet e, in ror nəfrakisien kin. Kini ror məkneikin, mə takni-əhu nəməhuak minə mə tukhapəh nisətərigien kin nhajounien kapəriā, pəh nhatətəyen kape nəməhuak minə tukriskai.^g ¹⁴Ətapig kin əriā mə tukhapəh nhavəhyen kwanage eikuə minə kape nəmə Isrel kupən, mhapəh min nhakwasigien kin narmamə yamə mine kwəsəta ta ye nəgkiarien əfrakis.^h ¹⁵Meinai, narmamə yamə mine kisatuatuk ye nimri Kughen, nar rirkək yame tukror əriā kasəmkimik. Mərig narmamə yamə mine kasəmkimik ye nimri Kughen, meinai iriā khapəh nishatətəyen ye Yesu, kini norien kirik rirkək yame tukror əriā kisatuatuk. Ror məkneikin mə nərigien kapəriā ramvən əmə tuk nahasien, kaseinein nəkirien norien minə. ¹⁶Iriā kamhani mə kharkun Kughen, mərig norien kapəriā ramhajoun mə kaseikuə, kwənhaukreikin-pən nimetairiā kimi Kughen. Iriā nəpnaihyen kapəriā rahas. Kasəsik nəkwai Kughen, kini mhapəh nisəmhenien mə to kisor nar huvə kirik.ⁱ

Nəvhagien ramvən kimi nəməhuak minə

2 ¹Mərig ik, Taetas, takaməkeikei mhajoun narmamə ye nhajounien yame raməri-pən huvə nəgkiarien atuatuk. ²Əvhag kimi nəwharu minə mə tuksarha huvə tuk nimraghien kapəriā nipig m-fam, masor narimnar ye nirkunien. Nimraghien kapəriā tukraməkeikei matuatuk, pəh narmamə tukhasiai əriā. Takəvhag kimi əriā mə tukasəkeikei mishatətə ye Kughen, misorkeikei narmamə, misərer tim tim ye nipig mifam.

³Kini ye norien kirikianə əmə min, takaməkeikei məvhag kimi nipiəwharu minə mə ye narəyen kapəriā tukhasiai Kughen. Mə tukhapəh nisoriahyen nhag narmamə, mhapəh nisapisien kin ninimien. Mərig tukasəkeikei mishajoun narmamə kin nimraghien atuatuk.^j ⁴Tuksarə huvə məknenkin, mharkun nhajounien nipiraovin min tiksın kin swatuk yame iriā tuksorkeikei kapəriā narman mine kwajikovə kapəriā minə. ⁵Nipiahuaru tukshajoun min nipiraovin tiksın mə tuksarha huvə tuk nimraghien kapəriā, kini kapəriā nimakuə kirikianə əmə. Mə tuksarha huvə tuk rukwanu kapəriā, misor rhuvə pən tuk narmamə, mhasiai narman kapəriā, tamə kini hah nəgkiarien kape Kughen.^k

⁶Kini ye norien kirikianə əmə min, takaməkeikei məvhag kimi nitamaruə mə tukasarha huvə tuk nimraghien kapəriā. ⁷Pəh tuksəm

^g 1:13 2 Tim 4:2 ^h 1:14 1 Tim 4:7 ⁱ 1:16 1 Jon 1:6; 2:4 ^j 2:3 1 Tim 3:11

^k 2:5 Efes 5:22

nimraghien kafam mə rhuvə, khakwasig kin ik. Nipig nakamhajoun, nimraghien kafam tukraməkeikei matuatuk, mor nəgkiarien kafam ripam.¹ ⁸Ik takaməkeikei mini əmə nəgkiarien əfrakis yame narmamə tukhapəh nisəmien nimeitam tuk nəgkiarien kafam, mhani hah ik. Pəh tukuror kafam tikmir minə kisauris, meinai khapəh nisəmien norien has kirik iram, kini mhapəh nhaniyen nar has kirik irətawə.^m

⁹Əvhag kimi slef minə mə tuksor nəkwai kapəriə namehuə minə, ye narimnar m-fam, mhasiai əriə, mhapəh nhaniyen tai nəgkiarien kape namehuə minə kapəriə,ⁿ ¹⁰mhapəh nisəkrəhyen kimi əriə. Mərig nipig mifam, tukasəkeikei masor nar yame ratuatuk ye nimri namasur kapəriə, mə tukhani nəfrakisien ye kapəriə wok. Ye norien yame tuksor narimnar fam, tukshajoun mə nəgkiarien kape Kughen yame rimivəh miragh ətawə, in ratuatuk mihuvə.

¹¹Hajoun narimnar mifam a, meinai Kughen rimnautə-pə kin kafan nihuvəyen kimi narmamə mifam, məhitə ye swatuk yame tukrivəh miragh əriə iran. ¹²Nihuvəyen a kape Kughen ramhajoun mə nipig kitawə kasarə ye tokrei tanə, tukasəkeikei misəpəh nəri-pəniyen norien has minə mine narimnar has minə kape tokrei tanə yamə mine kashaktə yerkitawə. Masəkeikei misarha huvə tuk nimraghien kapətawə, misor nəkwai Kughen. Nimraghien kapətawə tukraməkeikei matuatuk.^o ¹³Nimraghien kapətawə tukraməkeikei mor məknekin, kitawə tukaseito kin nipig yame Yesu Kristo tukruə iran. Yesu e, In Kughen kapətawə yame rimivəh miragh ətawə. ¹⁴Moriah kafan nimraghien marpin nimraghien kin kapətawə, mirəhsita ətawə tuk nahasien mifam. Məspir ətawə mə kitawə tukhauə kafan narmamə yamə mine kasorkeikei əmə nar yame rhuvə.^p

¹⁵Narimnar yame yakamrai kimik, takaməkeikei mhajoun narmamə kin. Ik nakvəh nehuəyen tuk nəvhagien mine norien kwirig kimi narmamə. Rahas mə narmamə tuksəm əhu ik.^q

Norien kapə nəməhuak minə

3 ¹Taetas, takəvhag kimi nəməhuak minə mə tukhasiai namehuə minə, mine gavman kapəriə. Masəkeikei masor nəkwairiə, kini masərer matuk ye nipig mifam tuk norien nar huvə minə.^r ²Mhapəh nisoriahyen nhag narmamə, mərig pəh misəruəhu nəmərinuyen, masor huvə pən kimi narmamə, mhavəh-si-əhu nərigien kapəriə, mhasiai narmamə m-fam.

³Meinai in apa kupən, kitawə min kimisətaəwao, miseinein nəfrakisien, mhapəh nisorien nəkwai Kughen. Təvhagə hah rimnarmaru irətawə mor

¹ 2:7 1 Tim 4:12 ^m 2:8 1 Pita 2:15 ⁿ 2:9 1 Tim 6:1 ^o 2:12 1 Jon 2:16 ^p 2:14 Eks 19:5; Dut 7:6; Esik 37:23; Gal 1:4; 1 Pita 2:9 ^q 2:15 1 Tim 4:12 ^r 3:1 Rom 13:1-7; 1 Pita 2:13-14

ətawə kisorkeikei nahasien, misorkeikei əmə narimnar tuk nərig-huvə-yen ye nipraitawə. Rikitawə rimnəkrəh kin nautə kape narmamə, kini kitawə misor hah pən kimi narmamə. Narmamə kimisəməkin ətawə, kini kitawə kisəməkin ətawə minə.^s

4 Mərig Kughen yame rimivəh miragh ətawə,
nihuvəyen mine norkeikeiyen kafan kratərhav-pə.

5 Mərig pəh nien mə In rimivəh miragh ətawə tuk norien atuatur
minə kapətawə. !Nikam! In rimivəh miragh ətawə ye norkeikeiyen kafan.

Rimnaikwas irətawə tuk norien has kapətawə, kisarha huvə min,
Nanmin Rhakə rimnow kin rikitawə.^t

6 Yesu Kristo yame rimivəh miragh ətawə,
In e swatuk kape Kughen ramətəmrin rikitawə kin Nanmin Rhakə
ye rikin agien.^u

7 In mor ətawə kisatuatur ye nimrin kin nihuvəyen kafan mə kitawə
tukhauə kafan kwajikovə minə,
kini mharkun huvə mə tukpihavəh nimraghien rerin.

8 Tuk nipig m-fam, tukasəkeikei mishatətə ye narimnar minə e yakamrai, meinai kasəfrakis. Kini yakorkeikei mə takhajoun narmamə kin, pəh narmamə yamə mine kamhani nəfrakisien ye Kughen, kapəriə nərigien tukramərer tim tim əmə tuk norien narimnar yame rhuvə. Nəgkiarien a rhuvə, kini ramasitu huvə ye narmamə.

9 Apəh marer isok tuk nəgkiarien ətəwao, mine nəgkiarien yame ravus ris, mine nətgohyen tuk niprai nəgkiarien kape loa minə. Apəh əmə nəgkiarien minə a meinai khapəh nisasituyen ye yermamə kirik, kini kapəriə nihuvəyen rirkək.^v 10 Kini tukmə yermamə kirik ramor narmamə kasəwhai əriə minə, takvən mægkiar skai kimin, mini-əhu. Mərig tukmə ramor min, kini takvən mini-əhu min. Mərig tukmə nakni-əhu mikiraru, mərig in raməkeikei ye kafan norien, kini takərer isok tukun.^w 11 Meinai nakirkun huvə mə yermamə yame ror məknakin, kafan nətərigien rahas, kini ramor kiko-iko. Kafan əmə norien ramhajoun mə in rapəh nəmhenien.

Nəgkiarien infamien

12 Jakher-pre kin yermamə kirik, Atemas uə Tikikas, tukruə məm ik. Nipig tukrurə, takaməkeikei mhai miren marha-kin swatuk kirik takuə məm yo apa yerkwano a Nikopolis, meinai nipig kape nokieiyen, yakmə jakvən aikin mamarə.^x 13 Kini yermamə mir kiraru, Apolos, mine loea e, nhagin e Sinas, kwəriwək ye nəriwəkien kapəriu, mərig ik takasitu

^s 3:3 1 Kor 6:9-11; Efes 2:1-2; 5:8 ^t 3:5 2 Tim 1:9; Hib 10:22 ^u 3:6 Wok 2:17-18

^v 3:9 2 Tim 2:14,16 ^w 3:10 Mat 18:15-17 ^x 3:12 Efes 6:21-22; Kol 4:7-8

irəriu ye narimnar yame kawəkwəkwə kin.^y ¹⁴Nəməhuak kapətawə minə tukasəkeikei mhauə mə kapəriə nərigien ramərer tim tim əmə tuk norien narimnar yame rhuvə, mə iriə tukharkun nisasituyen ye narmamə tiksin yame kapəriə narimnar rapəh nəmhenien. Rapəh nihuvəyen mə iriə tuksarə apnapig əmə.^z

¹⁵Taetas, narmamə yamə mine yakamarə kimawə miriə, iriə kamhani vi vi ik. Takni-pən rhuvə tuk nəməhuak yamə mine kasorkeikei ətawə.

Pəh nihuvəyen kape Kughen tukramarə tuk əmiə m-fam.

^y 3:13 Wok 18:24; 1 Kor 3:5-6 ^z 3:14 Efes 4:28